

TUTÚ DÍHNA NÍ CADÚHA TÉ JUÁÁ

Tnúhu sá càháⁿ nàcuáa naníhí tǎhú-ó

¹ Te yúhú té Juáá càhí tnúhu-í xii-ndo cuèndá Crìstú Yáá càháⁿ nàcuáa cundecu ndihí-o Yǎ Ndiǒxí. Te Crìstú-áⁿ sa ndècu-gá ndéé cútnàhá ní ngáva ñuyú. Te yúhú ní xiní núu-í ndihí cue téé ní xica cuu ndihí-í nàcuáa càa nacuáa ndùu-gá. Te ní xíndedóho-ndí tnúhu ní cáháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gǎ.

² Te ní quixi túu-gá ñuyú-a, te ní xiní-ndí-gá, te xíⁿ càhí tnúhu ndáá-ndí xii-ndo. Te càhí tnúhu tucu-ndí sá ndécú-gá ndihí Tǎtá-gá Dútú Ndiǒxí ní cùu, te ní quixi-gá ñuyú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tǎhú-ó cundecu ndihí-o Yá Ndiǒxí ni caa ni quíhíⁿ te núu na quíndáá iní-ó-gǎ.

³ Te xíⁿ dátǔu-ndí núu-ndó nchàa sá ñí xiní-ndí, ndihí nchaa sá ñí xíndedóho-ndí cuèndá cuu ñⁿnuu-o nchàa-o datná nchúhú cúu ñⁿnuu-ndí ndihí Tǎtá-ó Dútú Ndiǒxí, ndihí Déhe-gá Xítóhó Jesucrìstú.

⁴ Te xíⁿ nǔu tée-í nchaa tnúhu-a cuèndá cudíí iní-ó nchàa-o.

Yá Ndiǒxí cúu-gǎ datná ñⁿ ñuhú

⁵ Te nchaa tnúhu ní dánèhé ñáhá Xítóhó Jesucrìstú xii-ndí, xíⁿ dánèhé ñáhà-í xii-ndo. Te

ní cachí-gá sá Yă Ndiöxí cúú-gă dàtná ìⁿ ñuhú dáyèhé-gá iní-ó, te ducaⁿ sãtnahá-xi cùu-gá chi ío váha quide-gá, te ñá túú quide-gá ni ìⁿ sá cuèhé sá dúhá.

⁶ Te núu cächí-ó sã ndécú-ó ìchi Yá Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó nǔú-gă.

⁷ Te núu na càda váha-o dàtná quidé mèe-gá, te cuu ìⁿnuu-o nchàa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi diu cuendá-áⁿ ñí xíhí Déhe-gá Xítohó Jesucrístú núú cùrúxí.

⁸ Te núu cächí-ó sã ñà túú quide-o ni ìⁿ sá cuèhé sá dúhá, te dándahú-ó mèe-o, te ñá túú quide ndáá-ó nǔú Yă Ndiöxí.

⁹ Te núu na nàhmá-ó nchàa yícá cuèchi-o nǔú-gă, te mee-gă cada càhnu iní-gá, te ndada ndoo-gá iní-ó, cuendá cada ndáá-ó cùndecu-o ichi-gá, chi mee-gă ío váha quide-gá te ío ndáá quidé-gă, ducaⁿ ñí cáháⁿ-gá te ducaⁿ quide-gá.

¹⁰ Te núu na cächí-ó sã ñà túú quide-o ni ìⁿ sá cuèhé sá dúhá, te quide-o Yá Ndiöxí ìⁿ ñándéhdé, dico ñá túú ndèhnde-gá. Te ñá túú ndècu tnúhu-gá iní-ó te núu ducaⁿ na càda-o.

2

Xítohó Jesucrístú cáháⁿ ndàhú-gá cuendá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vǎ cáda-ndó ni ìⁿ sá cuèhé sá dúhá. Dico núu ìⁿ-ndo quide-ni-ndo nándi sá cuèhé sá dúhá, te ndècu ìⁿ Yaá cáháⁿ ndàhú cuendá-ó nǔú Yă Ndiöxí. Te Yaá-áⁿ cúú-gă Xítohó Jesucrístú Yaá quidé ndáá.

² Te ní xíhí-gá sá cuendá nchaa yíca cuěchi-o cuendá ngúndecu váha-o nńú-gă te núu na quíndáá iní-ó-gă. Te ñá díú-ní sã cuendá yíca cuěchi nchoo nń xíhí-gá, chi tnàhá cuendá nchaa yíca cuěchi ñáyiu ní cãa xico ñuyíú.

³ Te núu cada-o nchaa nacuáa cãháⁿ Yã Ndiõxí, te cutnùní iní-ó sã ndécú-ó ìchi-gá.

⁴ Te núu cãchí-ó sã ndécú-ó ìchi-gá te ñá túú quide-o nacuáa cãháⁿ-gá, te dàcuandehnde-o, te ñá túú quide ndáá-ó nńú-gă.

⁵ Te núu sàndáá ndisa iní-ó tnńhu-gá, te quide-o nchaa nacuáa cãháⁿ-gá, te ducaⁿ te cùu iní ndisa-o-gă, te cùtnuní ndáá iní-ó sã ndécú-ó ìchi-gá.

⁶ Te núu cãchí-ó sã ndécú-ó ìchi Yã Ndiõxí, te xìni ñuhu-xi cada ndáá-ó cùndecu-o ñuyíú-a dàtná ní quide ndáá Xítóhó Jesucristú cùtnàhá ní xíndecu-gá ñuyíú-a.

Ndudú sáá

⁷ Te nchòhó ñáyiu ndècu ndìhi-í ìchi Xítóhó Jesucristú, ñá túú chìdo tnuní-í ìⁿ tnńhu saa sà cúú-xí-ndó, chi díu-ni tnńhu sá nń ngúndecu ndìhi-ndo ndéé díhna, tnńhu ní xíndedóho-ndo ndéé cùtnàhá ní sàndáá iní-ndó-gă, xíãⁿ chídó tnùn-í.

⁸ Te tnńhu-a cùu-xi datná ìⁿ tnńhu saa tè-í dándàcu iní ñáhà-í xii-ndo nãcuáa ní quide Xítóhó Jesucristú cùtnàhá ní quixi-gá ñuyíú-a ní quide váha-gá, te tnàhá nchòhó ní tnì-ndo tnńhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiu ta dàña nchaa sá cuèhé sá dúhá cuãháⁿ, chi Xítóhó Jesucristú tá dândixi túu-gá

iní-yu cuendá cutnùní ínì-yu nàcuáa ndùu cuendá Yă Ndiöxí.

⁹ Te núu cächí-ó sǎ quidé vǎha-o, te cùu úhú ínì-ó tnàha ñáyi-u-o, te xǎⁿ ñǎ túú quide ndáá-ó, chi ndècu-ni-o ichi cuehé ichi duha sá dúcáⁿ quide-o.

¹⁰ Te núu na cùu ínì-ó tnàha ñáyi-u-o datná cúu ìní ñáhá mèe Yă Ndiöxí xii-o ña, te quide ndáá-ó nǔú-gǎ, te vǎ cánúichi-o tnaha ñáyi-u-o ñⁿ ichi cuehé ichi duha.

¹¹ Te núu cùu úhú ínì-ó tnàha ñáyi-u-o, te ñǎ túú quide váha-o nǔú Yă Ndiöxí, chi ndècu-ni-o ichi cuehé ichi duha, te ñǎ túú cùtnuní ínì-ó sǎ quidé-ó. Chi cùu-o datná ñⁿ tée ndècu núu née chi ñǎ cùtnùní núu-dě ndéé ichi quíhíⁿ-dé. Ducaⁿ sǎtnahá-xi cùu nchoo chi ñǎ cùtnùní ínì-ó ndéé ichi quíhíⁿ-ó te núu ducaⁿ na càda-o cuu úhú ínì-ó tnàha ñáyi-u-o.

¹² Te nchòhó ñáyi-u cùu datná déhe-í, yúhú chídó tnùnì-í tnúhu-a ñⁿ núú tütú cächí tnúhu-í xii-ndo sǎ nǐ quide càhnu ínì Yă Ndiöxí nchaa cuéchi-ndo, chi ñⁿ cuendá-áⁿ nǐ xíhí Xítóhó Jesucristú.

¹³ Te nchòhó ñáyi-u sacuéhé, yúhú tée-í tnúhu-a sá cúu-xí-ndó chi càháⁿ ndihì-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyíú. Te nchòhó ñáyi-u nchìcúⁿ-gá téé tucu-í tnúhu-a sá cúu-xí-ndó chi ñǎ túú sàndáá ínì-ndó tnúhu càháⁿ yucu ñǎvǎha.

Te nchaa nchòhó ñáyi-u cùu datná déhe-í, tée tucu-í tnúhu-a sá cúu-xí-ndó, chi sa càháⁿ ndihì-ndo Tǎtá-ó Dütú Ndiöxí.

¹⁴ Te nchòhó ñáyi-u nǐ sǎhnu, yúhú chídó tnùnì-í tnúhu-a ñⁿ núú tütú chi càháⁿ ndihì-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyíú. Te nchòhó ñáyi-u nchìcúⁿ-gá, yúhú chídó tnùnì-í tnúhu-a chi ío nǐhí ndéé-ndó ndècu-ndo, chi

tn̄i-ndo tn̄uhu càháⁿ Yă Ndiöxí. Te ñá túú sàndáá iní-ndó tn̄uhu càháⁿ yucu ñăvăha.

15 Te vá cúhúⁿ iní-ndó nì ìⁿ sá cuèhé sá dúhá ió ñuyíú-a, te ni vă cání iní-ndó càda-ndo. Chi núu na cùhuⁿ iní-ó nchàa sá cuèhé sá dúhá ió ñuyíú-a ña, te ñá túú Tătá-ó Dütú Ndiöxí ñúhú iní-ó te núu ducaⁿ na càni iní-ó.

16 Te nchaa ñáyiu ñuyíú-a quidé-yu nchaa sá cuèhé sá dúhá, chi ðiu nchaa xǎⁿ cúđí iní-yu cadá-yu. Te nchaa sá cuèhé sá dúhá sàni iní-yu, ndihì nchaa sá xìní-yu quidé-yu. Te xǐquide nínu-yu mèe-yu cuendá nchaa sá ndécú ndihí-yu. Te nchaa sá ñà túú văha ní cacu nihnu-xi ñuyíú-a.

17 Te nchaa sá ñà túú văha ió ñuyíú-a, ndihì nchaa sá sání cuèhé sání dùha iní-yu cuita ndihì nihnu-xi quíhíⁿ. Te nchaa ñáyiu tn̄i tn̄uhu càháⁿ Yă Ndiöxí cundecú-yu ndihì-gá ni caa ni quíhíⁿ.

Tnúhu ndáá tnúhu Yá Ndiöxí ndihì tnúhu ndehnde

18 Te nchòhó ñáyiu cùu datná déhe-í, sa nihí-ndó tn̄uhu sá quíxí ìⁿ tée cunuu-gă-dé cuu úhú iní-dé Crìstú. Te sa xǐndecu-gá ñáyiu cùu úhú iní ñáhá xì-gá, núu xǎⁿ cútnùní iní-ó sǎ sà ta cuyatni nduu naa ñuyíú-a.

19 Te ñáyiu-áⁿ nǐ xǐndecu ndihì ñàhá-yu xii-o, te ní queé-yu cuáháⁿ-yu chi ñá túú ní cùu ìⁿnuu-o ndihí-yu. Chi núu ðicó ní cùu ìⁿnuu-o ndihí-yu te cundecu ndihì ñàhá-yu xii-o ni cùu. Te duha ní cuu cuendá cutnùní ndáá iní-ó nchàa-o sá ñà túú cùu ìⁿnuu-o ndihí-yu, chi ñá túú sàndáá iní-yu Yá Ndiöxí.

20 Te Xítóhó Jesucrìstú ní taxi-gá Espíritú Yă Ndiöxí ndécú ndìhi-o, núu xǎⁿ tècú tnùnì-ó tnũhu-gá.

21 Te cuëndá sá xìnì-ndó tnũhu ndáá tnúhu Yá Ndiöxí nõu xǎⁿ téè-í tnúhu-a, te ñá díú ìⁿ sá ñă cútnùnì iní-ndó cùu-xi. Te sa nàha-ndo sá nì ìⁿ tnúhu ndehnde ñà túú ñùtnahá-xi núú tnũhu Yá Ndiöxí, chi mee ñìne-ni tnúhu ndáá cúú-xí.

22 Te nchaa ñáyiu càchí sá ñà díú Jèsús cúú Crìstú Yaá ní tendaha Yă Ndiöxí ní quixi ñuyíú-a dàcuandehndé-yu, te cùu úhú iní-yu Jèsús. Te diu-ní-yu càchí-yu sá ñà díú Dèhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndìhi Déhe-gá Jèsús.

23 Te nchaa ñáyiu ñà túú sàndáá iní sá Dèhe Yá Ndiöxí cúú Jèsús, ñáyiu-áⁿ ñà túú ndécú-yu ichi Tătá-ó Dütú Ndiöxí. Te nchaa ñáyiu càháⁿ sá Dèhe Yá Ndiöxí cúú Jèsús, ñáyiu-áⁿ ndécü-yu ichi Tătá-ó Dütú Ndiöxí.

24 Te nchaa tnúhu Yá Ndiöxí ní tecú dóho-ndo ndèè díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndìhi-ndo Yă Ndiöxí ndìhi Déhe-gá cuèi vá cùndècu túu-ndo ndìhi-gá ñuyíú-a.

25 Te Jèsús ní cachí-gá sá ndúú tǎhú-ó cùndecu ndìhi-o-gá ni caa ni quíhíⁿ andiu.

26 Te cuëndá nchaa ñáyiu dándahú ñáhá xì-ndo ní chídó tnùnì-í tnúhu-a,

27 dico nchòhó chi ndècu ndìhi-ndo Espíritú Yă Ndiöxí sá ñí taxi Xítóhó Jesucrìstú. Núu xǎⁿ ñà túú xìni ñuhu-ndo ñáyiu danèhé ñáhá xì-ndo, chi mee Espíritú-gá dánèhé ñáhá-xí nchàa sá vǎha. Te nchaa sá dánèhé ñáhá-xí xì-ndo cuu-xi sá ndàá, te

ñá díú ìⁿ tnúhu ndehnde. Te vitna chí cáncñícúⁿ nihnu-ni ichi Yá Ndiǒxí dàtná ní sanu ichi ñaha mée Espíritú-gá xii-ndo.

²⁸ Te nchòhó ñáyiú cùu datná déhe-í, chí cáncñícúⁿ nihnu-ni ichi Xítóhó Jesucrístú, chi cuèndá òré ná quíxí tucu-gá ñuyíú-a te vá yùhú-ndó te nì vá cúú càhaⁿ núú-ndó núú-gǎ.

²⁹ Te nchòhó sa nàha-ndo sá mée-gǎ quidé ndǎá-gá, te sa xìní-ndó sǎ ncháá ñáyiú quide ndǎá cúú-yu déhe Yá Ndiǒxí.

3

Ñáyiú cùu déhe Yá Ndiǒxí

¹ Te chí cuǎha cuèndá sá ïo cùu iní ñáhá Tǎtá-ó Dǔtú Ndiǒxí xii-o cuèndá sá cúú-ó dèhe-gá, chi ducaⁿ ñí cachí-gá, te déhe ndisa-gá cúú-ó. Te núu xǎⁿ ñáyiú ndècu ichi cuehé ichi duha ñá cúú quìní ñáhǎ-yu xii-o, chi ñá túú xìní-yu nàcuáa ndùu cuendá Yǎ Ndiǒxí.

² Te nchòhó ñáyiú ïo cùu iní-í, vitna cùu-o déhe Yá Ndiǒxí, te vátá cútnùnì váha-gá iní-ó nǎsa cundu-u-o ndèé núú cuáháⁿ núú vǎxi. Dico sa cùtnùnì iní-ó sǎ òré ná quìxi tucu Xítóhó Jesucrístú te nduu-o dàtná cáá mée-gá, chi quíní-ó-gǎ nàcuáa-ni càa nacuáa-ni ndùu-gá.

³ Te nchaa ñáyiú sa ndètu ñaha xii-gá sa ta ngǔndecu túha-yu cuáháⁿ, chi ta ndùu ndoo nduu nine iní-yu cuáháⁿ dàtná cáá ndòo caa nine mee-gá.

⁴ Te nchaa ñáyiú quide nándi sá cuèhé sá dúhá ñà túú quide váha-yu núú Yǎ Ndiǒxí, chi ní cachí-gá sá vǎ dúcáⁿ càda-o.

⁵ Te sa nàha-ndo sá ñǎ quixi túu Xítóhó Jesucrístú ñuyíú-a cuendá cada càhnu iní-gá nchaa sá cuèhé sá dúhá quide-o, chi mee-gă ñá túú quide-gá ni ñⁿ sá cuèhé sá dúhá.

⁶ Te nchaa ñáyiú ndècu ichi Yá Ndiǒxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xini-yu nàcuáa ndùu cuendá Xítóhó Jesucrístú te ni ñǎ túú xini-yu nása càa-gá.

⁷ Te nchòhó ñáyiú cùu datná déhe-í, vá dáñá-ndó mèe-ndo dandahú ñáhá ñáyiú ndècu ichi cuehé ichi duha, chi càchí-yu sá cúú cùndecu-o ichi Yá Ndiǒxí te cada-o nǎndi sá cuèhé sá dúhá dico ñá ndáá. Te nchaa ñáyiú quide váha quide ndáá-yu dàtná quidé mèe Jesús.

⁸ Te nchaa ñáyiú ndècu ichi cuehé ichi duha ndècu ndihí-yu yucu ñávǎha, chi ducaⁿ quide mee-xi ndéé cùtnáhá vátá ngǎva-gá ñuyíú. Te xíáⁿ ní quixi Jèsús Déhe Yá Ndiǒxí ní dáquéé tǐhú-gă nchaa sá quidé yùcu ñávǎha.

⁹ Te nchaa ñáyiú ní natuha ichi Yá Ndiǒxí ní nduú-yu déhe-gá, te ñá túú-gă quidě-yu nǎndi sá cuèhé sá dúhá chi ní ndada ndoo ní ndada nine-gá iní-yu. Núu xíáⁿ ñá túú-gă quidě-yu nǎndi sá cuèhé sá dúhá, chi ní ngùndecu ndihí ñaha-gă xíí-yu.

¹⁰ Te cùtnuní iní-ó nǎndi cùu ñáyiú cùu déhe Yá Ndiǒxí, te cùtnuní iní-ó nǎndi cùu ñáyiú cùu déhe yucu ñávǎha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-áⁿ ñá díú dèhe Yá Ndiǒxí cúú-yu.

Cuu iní tnáhá-ó ñⁿ ñⁿ-o

11 Te ndéé òré ní natuha-o ìchi Yá Ndiǒxí ní tecú dóho-o sǎ cúú ìní-ó tnàha ñáyiu-o.

12 Te vá cúndùu úhú ìní-ó dàtná ní guide ndíi Càín, chi ndíi-áⁿ nǐ xíndecu ndíi ndíi yucu ñávàha núu xǎⁿ ní sahni ndíi ñaní ndíi. Te ducaⁿ nǐ guide ndíi chi ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

13 Te nchòhó ñáyiu ndècu ndíi-í ichi Xítóhó Jesucristú, vá cádá cuèndá-ndó sǎ cúú ùhú ìní ñáhá nchàa ñáyiu ndècu ichi cuèhé ichi duha xii-ndo.

14 Te cunaha-ndo na càchí tnúhu-í xii-ndo sǎ nǔu na cùu ìní-ó tnàha ñáyiu-o, te cùtnuní ìní-ó sǎ sà ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tni-o ìchi váha. Te nchaa ñáyiu ñá túú cùu ìní tnàha ñáyiu-xi ñúhu-ní-yu ichi cuáháⁿ-yu núú ùhú núú ndàhú.

15 Te nchaa ñáyiu ñá cúú quíní ndeé tnàha ñáyiu-xi cùú-yu dàtná ìⁿ ñáyiu sàhni ndíyi. Te nchòhó sa nàha-ndo sá nì ìⁿ ñáyiu sàhni ndíyi ñá túú ndècu ndíi-yu tnúhu ndee ìní sá nánihí tàhú-yu.

16 Te Xítóhó Jesucristú ní xíhí-gá cuèndá nchaa yíca cuèchi-o, núu xǎⁿ cùtnuní ìní-ó sǎ ìo cùu ìní ñáhá-gǎ xii-o. Te xǎⁿ cùtnuní ìní-ó nàcuáa cada-o cùu ìní-ó tnàha ñáyiu-o, te cuèi na cùú-ó cuèndá sá cúú-xí ìⁿ-yu, cuèndá-nǎ sá ná dàcácu nihnu-ò-yu núú tnúndòho ndecú-yu.

17 Te núu ndècu ndíi-o sá cóhó sǎ cǎxí-ó ndíi nchaa sá nándíi-o, te ndècu ñáyiu ndàhú ñá túú vèdana ná ndécú ndíi, te ñá túú chindee-ó-yu, te ñá túú cùu ìní-ó Yá Ndiǒxí te núu ducaⁿ na càda-o.

18 Te nchòhó ñáyiu cùu datná déhe-í vá cuèndá-ni cúnàha cáháⁿ-ndó sǎ cúú ìní tnáhá-ndó, chi cuu ìní

tnáhá ndìsa-ndo te coto tnàha-ndo.

Vá yùhú-ó nǔú Yǎ Ndiǒxí

¹⁹ Te núu ducaⁿ na càda-o, te cutnùnì iní-ó sǎ ndécú-ó ìchi ndáá ichi Yá Ndiǒxí, te ñá túú-gǎ ná quihì iní-ó nǔú-gǎ.

²⁰ Te núu ndìhú iní-ó cuèndá ìⁿ sá nǐ quide-o, te sa nàha Yá Ndiǒxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa iní-ó.

²¹ Te nchòhó ñáiyu ío cùu iní-í, na càchí tnúhu-í xii-ndo, te núu ñá túú nǎ sánì iní-ó te ñá túú nǎ quidé-ó, te vá yùhú-ó nǔú Yǎ Ndiǒxí.

²² Te nchaa sá váha na càcáⁿ-ó nǔú Yǎ Ndiǒxí, te mee-gǎ taxi-gá chi tnì-o tnúhu càháⁿ-gá, te quide-o nchaa nacuáa cùu iní-gá.

²³ Te ní cachí Yǎ Ndiǒxí sá quìndáá iní-ó Dèhe-gá Xítóhó Jesucrìstú, te cuu iní-ó tnàha ñáiyu-o dàtná ní cachí-gá.

²⁴ Te nchaa ñáiyu tnì tnúhu-gá ndécũ-yu ichi-gá, te ndècu ndìhì ñaha-gá xií-yu. Te cùtnunì iní-ó sǎ ndécú-ó ndìhì-gá chi ní taxi-gá Espíritú-gá ndécú ndìhì-o.

4

Ñáiyu ndècu ndìhì Espíritú Yǎ Ndiǒxí ndìhì ñáiyu cùu úhú iní ñáhá xii Xítóhó Jesucrìstú

¹ Te nchòhó ñáiyu ío cùu iní-í, vá cùtexínu quìndáá iní-ndó tnúhu càháⁿ nchaa ñáiyu càchí sá ndécú ndìhì Espíritú Yǎ Ndiǒxí. Chi díhna-gá cada cuèndá váha-ndo te núu càháⁿ ndáá-yu nàcuáa càháⁿ tnúhu Yá Ndiǒxí, chi ío vài ñáiyu ñuyíú-a cachí-yu sá càháⁿ-yu tnúhu-gá dico ñá ndáá.

² Te duha cutnùnì iní-ó nǎndì cùu ñáyiu ndècu ndìhi Espiritú Yá Ndiǒxí. Nchaa ñáyiu càháⁿ ndáá sá Xítohó Jesucrístú ní quixi-gá ñuyíú-a te ní cuu-gá ìⁿ yiqui cùñú, ñáyiu-áⁿ cúŷ-yu ñáyiu cùu cuendá Yá Ndiǒxí.

³ Te nchaa ñáyiu ñá túú càháⁿ nàcuáa càa Jesús cútnàhá ní quixi-gá ñuyíú-a ñáyiu-áⁿ dándahú ñáhă-yu, chi ñá túú cùú-yu ñáyiu cùu cuendá Yá Ndiǒxí. Te ñu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gá, dico yúhú càchí tnúhu-í xii-ndo sá sà ndecú-yu.

⁴ Te nchòhó ñáyiu cùu datná déhe-í, ndècu ndìhi-ndo Yá Ndiǒxí, te ñá dáñá-ndó dándahú ñáhá nchàa ñáyiu càchí sá càháⁿ tnúhu-gá te ñá ndáá. Te ñá túú sàndáá iní-ndó chi Yá Ndiǒxí Yaá ndécú ndìhi-ndo taxi tnuní víhí-gá dàcúúxí yùcu ñávăha ndècu ndìhi nchaa ñáyiu ñùhu ichi cuehé ichi duha.

⁵ Te nchaa ñáyiu dándahú ñáhá sǎ càháⁿ tnúhu Yá Ndiǒxí ndécŷ-yu ichi cuehé ichi duha, te mee-ni cuendá nchaa sá íó ñuyíú-a càháⁿ-yu. Te tédóho ñaha nchàa dava-gá ñáyiu ndècu ñu-ni ichi cuehé ichi duha.

⁶ Te nchoo cùu-o ñáyiu cùu cuendá Yá Ndiǒxí. Te nchaa ñáyiu xĩndecu ichi-gá tnĩⁿ-yu tnúhu càháⁿ-ó, te nchaa ñáyiu ñá túú ndècu ichi-gá ñá túú tnĩⁿ-yu tnúhu càháⁿ-ó. Te duha te cùtnuní iní-ó nǎndì cùu ñáyiu càháⁿ ndáá, te cùtnuní tucu iní-ó nǎndì cùu ñáyiu dándahú ñáhá.

Cuu iní-ó tnàha ñáyiu-o dàtná cúú iní ñáhá mèe Yá Ndiǒxí xii-o

⁷ Te nchòhó ñáyiu ío cùu iní-í, xìni ñuhu-xi cuu iní tnáhá-ó dàtná cúú iní ñáhá mèe Yá Ndiǒxí

xii-o, chi mee-gă táxí-gă sá xìní tnùní-ó cuendá cuu iní-ó tnàha ñáyi-u-o. Te nchaa ñáyi-u cùu iní tnàha ñáyi-u-xi cùú-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gá xií-yu.

⁸ Te nchaa ñáyi-u ñá túú cùu iní tnàha ñáyi-u-xi ñá túú ndècu ndìhí-yu Yá Ndiöxí. Te nchaa ñáyi-u ndècu ndìhi Yá Ndiöxí, ñáyi-u-áⁿ sãñaha-gă sá xìní tnùní-yu cuendá cuu iní-yu tnàha ñáyi-u-yu.

⁹ Te cùtnuní iní-ó sã cùú ìní ñáhá Yă Ndiöxí xii-o nchàa-o, chi ní tendaha-gă ìⁿdìi díi-ni Déhe-gá Xítóhó Jesucristú ní quixi-gá ñuyú-a cuendá sá díú-gă cada te naníhí tàhú-ó, te núu na quindáá iní-ó tnùhu-gá.

¹⁰ Te ío cùu iní ñáhá Yă Ndiöxí xii-o nchàa-o. Te ñá díú sã méé-ó cùu iní-ó-gă, chi díhna-gá méé-gă sa cùu iní ñáhá tnàhí-gá xii-o, núu xíãⁿ ní tendaha-gă Déhe-gá ní quixi-gá ñuyú-a ní xíhí-gá sá cuendá nchaa yíca cuèchi-o.

¹¹ Te nchòhó ñáyi-u ío cùu iní-í, xìní ñuhu-xi cuu iní tnáhá-ó, chi mee Yă Ndiöxí ío cùu iní ñáhá-gă xii-o.

¹² Te ni ìⁿ nchoo ñáyi-u ndècu ñuyú-a ñá túú xìní-ó nàcuáa càa Yá Ndiöxí, dico nchoo ñáyi-u ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíãⁿ cùú ìní tnáhá-ó ìⁿ ìⁿ-o, te cùtnuní iní-ó sã cùú ìní ndisa-o-gă.

¹³ Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espíritú-gá ndécú ndìhi-o.

¹⁴ Te yúhú ndìhi dava-gá cue téé ní xica cuu ndìhi-gá càháⁿ-ndí sá ñí xíní-ndí Jèsús Déhe Yá Ndiöxí ní quixi-gá ñuyú-a, chi Tătá-ó Dütú Ndiöxí

ní tendaha ñàha xii-gá ní quixi-gá cuèndá dàcácu nihnu-gá nchaa nchoo ñáyiú ndècu ñuyíú-a núú ùhú núú ndàhú.

¹⁵ Te nchaa ñáyiú càháⁿ ni yùhu ni iní-xi sá Dèhe Yá Ndiöxí cúú Jèsús, ñáyiú-áⁿ ndécü-yu ichi-gá te ndècu ndihì ñaha-gá xií-yu.

¹⁶ Te sàndáá iní-ó nì yuhu ni iní-ó sã Yã Ndiöxí cúú iní ñáhá-gã xii-o, chi ducaⁿ ìní-gá. Te nchaa ñáyiú cùu iní ñáhá xii Yá Ndiöxí ndécú ndihì ñaha-gá xií-yu.

¹⁷ Te núu ndisa cùu iní-ó Yã Ndiöxí te vá yùhú-ó òré ná sàá nduu tàudiiⁿ ñaha-gá xii-o tnùú nchaa ñáyiú ndècu ichi cuehé ichi duha, chi quide ndáá-ó ndècu-o núú-gã ñuyíú-a dàtná ní quide mee Jèsús.

¹⁸ Chi nchaa ñáyiú cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gá. Te núu yùhú-yu te xíãⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yã Ndiöxí, chi mee-gã ndéé cútnàhá vátá quìndáá-gá iní-ó tnùhu-gá sa cùu iní ñáhá-gã xii-o.

²⁰ Te nchaa ñáyiú càchí sá cúú ìní-yu Yá Ndiöxí, te cùu úhú iní-yu tnàha ñáyiú-yu, ñáyiú-áⁿ dácuàndehndé-yu. Te núu ñá túú cùu iní-yu tnàha ñáyiú-yu ndècu ñuyíú-a ña, te uuⁿ-gá quidè-yu Yá Ndiöxí Yaá ñá túú xìní núú-yu.

²¹ Te càchí-gá núú tnùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tnàha ñáyiú-yu.

Nchaa ñáyiu ní ndacu ní dáñá ìchi cuehé ichi duha

¹ Te nchaa ñáyiu sàndáá iní sá Jèsús cúú-gă Crìstú Yaá ní quixi ñuyíú-a, ñáyiu-áⁿ cúú-yu déhe Yá Ndiǒxí. Te cùu iní-yu Tătá-ó Dűtú Ndiǒxí, te cùu iní-yu Déhe-gá.

² Te núu cùu iní-ó Yă Ndiǒxí te quide-o nacúáa càháⁿ-gá, te cùtnuní iní-ó să cúú ìní tnáhá ndisa-o nacúáa ndècu-o ichi-gá.

³ Te núu cùu iní-ó Yă Ndiǒxí te tn̄i-o tnúhu càháⁿ-gá, chi cùtnuní iní-ó să ñà díú ìⁿ sá ùhú cúú-xí dàtná càchí ñáyiu.

⁴ Te nchaa nchoo ñáyiu cùu déhe-gá sa ní dáñá-ó ìchi cuehé ichi duha, chi ní sàndáá iní-ó Jèsús núu xǎⁿ ní ndacu-o ñí dáñá-ó ìchi-áⁿ.

⁵ Te nchaa ñáyiu sàndáá iní sá Dèhe Yá Ndiǒxí cúú Jèsús ní ndacú-yu ní queé-yu ichi cuèhé ichi duha.

Nàcuáa ní càháⁿ Yă Ndiǒxí cuèndá Jèsús

⁶ Te Xítóhó Jesucrìstú ní quixi-gá ñuyíú-a, te ní sandute-gá. Te ñà díú-ní xǎⁿ, chi ní xíhí-gá sá cuèndá nchaa yícá cuèchi-o. Te Espíritú Yă Ndiǒxí càháⁿ-xi mee-ni să ndáá, chi càháⁿ Espíritú-gá-áⁿ să Jèsús cúú-gă Crìstú Yaá ní quixi ñuyíú-a.

⁷ Te úní testiú ndécú àndiú, Tătá-ó Dűtú Ndiǒxí, ndihi Déhe-gá Xítóhó Jesucrìstú, ndihi Espíritú-gá. Te ìⁿ-ni tnúhu càháⁿ ndi nùní testiú-áⁿ.

⁸ Te ducaⁿ cùu-xi ñuyíú-a tucu, chi càháⁿ Espíritú Yă Ndiǒxí sá Jèsús cúú-gă Crìstú. Te ní sandute-gá, te ní xíhí-gá sá cuèndá nchaa yícá cuèchi-o. Te xǎⁿ cùtnùní ndáá iní-ó să díú Jèsús cúú-gă Crìstú.

⁹ Te núu tn̄i-o tnúhu váha càháⁿ ñáyiu, te váha-gá tn̄i-o tnúhu càháⁿ Yă Ndiǒxí, chi càháⁿ ndáá-gá sá Dèhe-gá cúú Jèsús.

10 Te nchaa ñáyiú sàndáá iní sá Jèsús cúú-gă Déhe Yá Ndiöxí, ñáyiú-án cútnùní iní-yu sá cúú-xí ìⁿ sá ndáá. Te nchaa ñáyiú ñá túú sàndáá iní tnúhu càháⁿ Yă Ndiöxí quidé-yu-gá ìⁿ ñándéhdé, dico ñá túú ndèhnde-gá, chi mèé-yu ñá túú sàndáá iní-yu sá Dèhe-gá cúú Jèsús dàtná càchí méé-gă.

11 Te Yá Ndiöxí càchí tnúhu ndáá-gá sá cùndècu-o ndihí-gá ni caa ni quíhíⁿ. Te duha càháⁿ-gá chi sàndáá iní-ó Dèhe-gá.

12 Te nchaa ñáyiú na quèndáá iní ñáhá xii Déhe-gá cundecú-yu ndihí-gá ni caa ni quíhíⁿ. Te nchaa ñáyiú ñá túú sàndáá iní ñáhá xii Déhe-gá vá cùndècú-yu ndihí-gá.

Sáhu ndèé núú nǐ ndihí-ná

13 Te cuèndá sá sàndáá iní-ndó Dèhe Yá Ndiöxí nǔu xiáⁿ chídó tnùní-í tnúhu-a cuèndá cutnùní iní-ndó sǎ cùndècu ndihí-o-gá ni caa ni quíhíⁿ.

14 Te ñá túú tnúhu yùhú càháⁿ ndihí-o Yă Ndiöxí, chi tedóho ñaha-gă xii-o nǔu ìⁿ-ná sá ná càcáⁿ-ó nǔú-gă dàtná cuìní méé-gă.

15 Te cùtnuní iní-ó sǎ táxí-gă sá xìcáⁿ-ó nǔú-gă, chi nàha-o sá tédóho ñaha-gă xii-o nǔu na càcáⁿ-ó nàcuáa cùu iní-gá.

16 Te núu xìní-ó ñáyiú ndècu ichi Yá Ndiöxí te quidé-yu sá ñà túú vǎha núú-gă, te ndèhe-o sá ñà túú ní xíta nihnu duúⁿ-yu, te càháⁿ ndihí-o Yă Ndiöxí cuèndá-yu, te dàcácu nihnu ñaha-gă xii-yu te núu na nùcúnu ichi váha-yu. Chi ió ñáyiú xidó quidé nǎndí sá ñà túú vǎha te xíta nihnu duúⁿ-yu, te vá càháⁿ ndihí-gá-ó Yă Ndiöxí cuèndá-yu.

17 Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùuⁿ.

¹⁸ Te nàha-o sá nchóó ñăyiu cùu déhe Yá Ndiöxí ñá túú-gă sání iní-ó càda-o nándi sá cuèhé sá dúhá. Te ducaⁿ chi mee Jèsús déhe Yá Ndiöxí xító ñàha-gá xii-o, núu xiăⁿ ñá ndácú-gă yucu ñăvãha dàxínu iní ñáhá-xí xii-o cada-o sá ñà túú vãha.

¹⁹ Te nchoo nàha-o sá ndécú ndihí-o Yá Ndiöxí. Te nchaa ñăyiu ndècu ichi cuehé ichi duha tàxi tnuní ñáhá-nă yucu ñăvãha xií-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiöxí ní taxi-gă sá xini tnùní-ó cuendá cutnùní iní-ó sã méé-gă cúú-gă Ndiöxí-ó. Te ndècu ndihí-o mee-gă ndihí Déhe-gă Jèsús, te ñndi díí-ni mee-gă cúú-gă Yá Ndiöxí, te ndècu dava-gă sá nácuàca ñaha-gá xii-o cùndecu-o ndihí-gá ni caa ni quíhíⁿ.

²¹ Te nchòhó ñăyiu cùu datná déhe-í, vá quìndáá iní-ndó nchàa sá càchí-yu cùu ndiöxí, chi dícó ndaha cue téé ñuyíú-a ní cuáha nchaa xiăⁿ. Te ducaⁿ na cùnduu. Te ío chí cádá ndèe iní-nă vítna.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939